

EDITORIAL

Igsalikway an buwa nga kamurayawan, magpursige ha dalan han gerra han katawhan

Piho nga ighihinambog ni Marcos ha iya ikapat nga State of the Nation Address an programa han "kamurayawan ngan kauswagan" nga iginpapasulong han iya rehimen. Gagamiton niya ini nga okasyon para dayawon an iya mga pasista nga suruguon ngan alipures ha "pagpupoy ha armado nga sumpakiay." Kadungan hini, tatahuban niya an grabe nga pangabuso ha poder ngan pagtamas-tamas ha mga demokratiko nga katungod, ha kasyudaran ngan labina ha kabaryuhan.

Buwa ngan buaw an "kamurayawan ngan kauswagan" nga unod han "National Action Plan for Unity, Peace and Development" ni Marcos. Usa ini nga mapan-uwat nga islogan agud tahuban an kamatuoran han samwak nga kakablasan, kagutom ngan pag-inantos han pira kanapulo kamilyon nga parag-uma ngan trabahador ngan mga waray pakabuhi. Katuyuanan hini nga ipakarawat ha katawhan nga kapalaran an gin-aantos nira nga pananalumpigos ngan paniniyupi agud piangon an ira diwa ngan kusog nga magdependa ngan umato, ngan payukbuon hira ha poder han terorista nga estado.

Ha tahub han "kamurayawan," gin-gagamit ni Marcos an mga armado nga pwersa han estado ha pag-imponer han balaud militar ha kabaryuhan agud pupoyon an pag-ato han masa nga parag-uma. Tuyo hini nga manmanan an kada gios han mulopyo, kontrolon an suplay han pagkaon ngan komersyo, pati oras han pagtatrabaho ha uma han mga parag-uma. Ngatanan gin-oobliga nga magpa-"clear" han ira nga-

ran ngan "makigbuligay" ha mga upisyal militar. Waray hunong nga ginhaharas an kilalado nga mga lider ngan aktibo ha mga asosasyon han parag-uma. Paluyo-luyo an mga kaso han pagpatay, pagdakop ngan ilegal nga pagpriso, tortyur ngan mga masaker, panganganyon ngan paghuhulog han bomba hirani ha mga komunidad.

Agud hadlukon an molupyo, ginkakampuhan han mga tim han mga sundalo an mga baryo, ngan gin-gagamit nga barracks an mga eskoylahan o *barangay health center*. Ginriringgal nira an kamingawan ha baryo ha paghinubog, paghuygo, paggamit han droga ngan waray wantas nga pagpapabuto han pusil. Ha ngaran han "panterritoryo nga depensa," pwersahay nga ginrerektrut han mga sundalo an mga parag-uma ha paramilitar nga grupo nga CAGU ngan Barangay Intelligence Network agud gamiton hira kontra ha ira mga kahimaryo.

Ha ngaran han "pagpapahitaas ha kapasidad" han mga komunidad ha kasyudaran, gin-gagamit ni



Marcos an iya armado nga pwersa agud pupuyon an katungod han mga trabahador, бага-*trabahador*, kabatan-unan-nga-estudyante ngan iba pa nga sektor ha kasyudaran. An mga unyonista ngan mga aktibista ha eskoylahan ngan mga komunidad iginpapailarum ha sarbeylans ngan pananarhug agud paundangon ha ira pag-oorganisa ngan pagbulig ha ira igkasi. Sugad ha kabaryuhan, gin-gagamit nga taktika an pan-gigipit ngan waray hunong nga pananarhug ha ira mga pamilya agud puguson hira nga umalagad ha karuyagon han militar ngan pulis.

Engrande nga pan-nguwat ha masa nga parag-uma an iginraraku-dako ni Marcos nga "pandistribwer han titulo" bisan kun kadam-an hiton hadto pa nira katin nga kolektibo nga titulo (Certificate of Land Ownership Award) ilarum han "agrarian reform communities," kalakip an mga tuna nga naipanhatag hadto han rebolusyunaryo nga kagiusan ha mga parag-uma ngan nasyunal nga minoriya, nga ginbababhin agud masayon nga paliton o agawon han dagko nga parupanlupot han tuna.

Higluag nga katunaan an ginsu-subasta ni Marcos ha mga langyaw nga dagko nga kapitalista ha porma han "pagpapaplete" hin tubtub 99 katuig. Narunapulo kayukot nga parag-uma ngan mga nasyunal nga minoriya an ginpapalayas agud tagan-dalan an mga plantasyon, minahan, mga pan-enerhiya nga proyekto, turismo ngan iba pa nga operasyon han dagko nga kompaniya nga langyaw ngan lokal. Gintatanyagan hira ni Marcos nga mamuhunan nga waray o haros waray kabaraydan nga buhis. Piho nga mas mabug-at pa nga mga kontra-katawhan ngan kontra-nasyunal nga palisiya an igmamando ni President Trump han US ha papet nga hi Marcos ha pagkiritan nira ha White House.

Kalugaringon la an gin-uuwat ni ra Marcos, han iya mga upisyal militar ngan kakunsabo ha NTF-Elcac ha pagrarakudako nga hirani na nira maperdi an Bagong Hukbong Bayan. Uusa nala kuno an prente gerilya ha bug-os nga nasud, kundi mayoriya pa gihap han mga pankombat nga batalyon han AFP an nakadeploy kontra ha BHB ha bug-os nga nasud.

Gin-gagamit ni Marcos an pipira nga nagtraydor ha masa agud kumanta hin pagdayaw ha iya "kamurayawan ngan kauswagan." Hira ngatanan reaksyunaryo nga ispesyal nga ahente agud magyawyaw han disimpormasyon ngan buwa kontra ha rebolusyunaryo nga kagiusan.

An "kamurayawan" ni Marcos kamingawan han lubnganan han mga biktima han iya pasista nga paghahadi. Iginselebrar han imperyalismo nga US ngan mga lokal nga naghahadi nga klase an kamingawan nga iginpaparayaw ni Marcos agud libyano nira nga luputon an tuna han masa nga parag-uma, panason an mga bukid ngan salog, dambungon an karikuhan han nasud, kurakuton an baul-karikuhan ngan tukuron ha nasud an poder han pwersa militar han US.

Ini nga buwa nga "kamurayawan" ni Marcos ngan han iya NTF-

Elcac ngan AFP, dako man gud nga ulang ha pakig-erestorya pankamurayawan ha NDFP. Ulang gihap an padayon nga paglinanat, pagpaprison ngan pagpatay ha mga konsultant ngan tinaglawas han NDFP, sukwahi ha mga kasarabutan hadto. Diri makakab-ot an makatadungan, makataralwas ngan maihaan nga kamurayawan tubtub nga diri gin-aatubang ngan ginsosolbar an batakan nga mga problema nga aada ha gamot han armado nga sumpakiay ha nasud, ngan kun an katuyuanan gud la rumkon, puypuyon ngan pasurenderon an ngatanan nga naato.

Kinahanglan isalikway han katawhan Pilipino an buwa ngan buaw nga kamurayawan ni Marcos. Atubangan han natikagrabeng panmuyop, natikagrabeng porma han pananalumpigos ngan paniniyupi, ngan paggrabe han krisis han dunot nga bagakolonyal ngan bagapyudal nga sistema, waray iba nga pagpipilian an katawhan Pilipino kundi an dalan han armado nga pakig-away. An armado nga pakig-away an pinakamabakod nga armas han katawhan agud depensahan an ira katungod, kinabuhi ngan pakabuhi. Kun waray armado nga pakig-away an katawhan, waray wantas nga manawan-tawan an imperyalismo nga US ngan mga naghahadi nga klase ha pananalumpigos ngan paniniyupi ha katawhan.

Ha luyo han gin-antos nga mga kaperdihan bunga han kalugaringon nga mga kaluyahan ngan atubangan han todo nga atake han AFP, determinado an Bagong Hukbong Bayan nga magpursige ha dalan han armado nga pakig-away, itul-id an daan nga mga kaluyahan ngan pakusgon an rebolusyunaryo nga pag-ato. Ha pamumuno han Partido, dirudiretso nga mahiluag ngan makusog an BHB ngan base panmasa hini ha bug-os nga nasud. Nagpapabilin nga matambok gud an tuna agud mapasulong an armado nga pakig-away ngan utro nga pakusgon an mga prente gerilya agud magserbe nga kuta han pag-ato han katawhan para ha nasyunal ngan pankatilingban nga pagtatalwas.

 Tuig LVI Ihap 14 Hulyo 21, 2025	
Igin-gagawas an Ang Bayan ha lenggwahe nga Pilipino, Bisaya, Iloko, Hiligaynon, Winaray ngan Ingles. Nakarawat an Ang Bayan han mga kontribusyon ha porma han mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton mantalaan.	
Gin-uunod Editorial: Igsalikway an buwa nga kamurayawan, magpursige ha dalan han gerra han katawhan 1 2 nga pulis, gin-ambus han BHB-Mindoro 3 Panriringgal ha mga parag-uma, nagpapadayon 3 Mga protesta 3 Dorudosena nga "EDCA site" 4 Mga parag-uma ha Hacienda Chiquita, palalaysin 5 Makahiribang nga dredging ha Ilocos Sur 6 Sa madaling salita 7 Destroso ha mga proyekto nga renewable energy 8 Pag-ato ha pakuri ngan niyutiyo nga estado ha Kenya 9 Pagbista ha kaso ni Duterte ha ICC, ingindedelatar 10 ₱20 nga pamalit han presko nga humay, gin-insister 10 Semana han paghandum ha mga martir han India 10	
An Ang Bayan igin-gagawas duha kabeses kada bulan han Komite Sentral han Partido Komunista ng Pilipinas	
 ang.bayan@cpp.ph	

2 nga pulis, gin-ambus han BHB-Mindoro

NAPATAY HA USA NGA ambus han Bagong Hukbong Bayan (BHB)-Mindoro (Lucio de Guzman Command) an duha nga pulis samtang nabiyahe ha Barangay Bagong Silang, Victoria, Oriental Mindoro hadton Hulyo 13 han kulop. Sigon ha hukbo han katawhan, baton ini ha hingyap han mga Mindoreño nga pabatunon an AFP-PNP ha terorista nga kampanya hini ha mga bungto ha Central Oriental Mindoro.

An presensya han militar ngan pulis ha bungto han Victoria kaparte han paghahatag seguridad ha dagko nga mapanhibang ngan kontra-katawhan nga proyekto. Kalakip dinhi an pito nga lugar ha pagkukwari ha Victoria nga gintugutan han lokal nga gubyerno. Namamangpangan gihap an pagsakob han dako nga operasyon nga mina ha Victoria tikang ha pagbuhi ha Mineral Production Sharing Agreement han Mindoro Nickel Project.

Hihibangon hini an yukut-yukot kaektarya nga katunaan diin nakasari an pakabuhian han mga parag-uma ngan minoriya nga Mangyan. Kasagaran na nga gios para ha pulis ngan militar an pagpwesto antes magtikang an mga mapanhibang nga proyekto agud pugngan an pagdedepensa han katawhan ha ira tuna ngan natural nga karikuhan.

Panringgal ha mga komunidad han parag-uma, nagpapadayon

DIRUDIRETSON AN panringgal han militar ngan pulis ha mga komunidad han parag-uma ha Cavite, Masbate ngan Negros Occidental.

Ha Masbate, gin-aresto ngan ginsalawdan han kaso nga rebelyon an upat nga sibilyan. Gindakop hadton Hunyo 25 ha Barangay Baras, Esperanza hira Ronnie Ursal, Manlik Espinosa ngan Melicio Malaras, ngan hadton Hunyo 11 hi Vicente Colomna. Labot kan Colomna, nakagawas an tulo nga iba pa. Samtang, iginpailarum ha *de facto* nga balaud militar an siyam nga barangay ha bungto han Palanas ngan Dimasalang tikang hadton Hulyo 11.

Ha Himamaylan City ha Negros Occidental, gintarhug han mga traydor nga ahente nga "surenderi" nga papatayon an mag-asawa nga hira Jolibert ngan Rica Basilio kun diri hira sumurender ngan makikigbuligay ha 94th IB. Nahitabo an pananarhug hadton Hulyo 9 han kadtuon nira an mag-asawa ha ira balay ha Sityo Cabagal, Barangay Buenavista. Nagdurot an insidente han kahadlok diri la ha mag-asawa kundi ha bug-os nga komunidad.

Ha Cavite, namamangpangan nga kampuhan han 2nd Civil Military Operation (CMO) Company ngan Task Force Ugnay an komunidad han Tartaria ha Silang, Cavite agud gipiton an dirudiretso nga pag-ato han mga parag-uma ngan residente ngan palayason hira ha lugar.

Samtang, gin-gipit han Bureau of Corrections (BuCor) an tagapagyakan han grupo nga Kapatid nga hi Fides Lim kahuman niya igreklamo an mga ilegal ngan diri makatawo nga palisiya han ahensya. Gindid-an hiya nga makasakob ha ngatanan nga mga prisuhan nga aada ha ilarum han hurisdiksyon han BuCor. Aktibo hi Lim ha pagpapalutaw ngan pagdudul-ong han makatawo nga ayuda ngan nakikigbisog para ha mga katungod han mga prisopulitikal ha butnga han nahibabalita nga pagpapasibaya ngan abuso ha sakob han New Bilibid Prison ngan iba pa nga prisuhan.



Mga kababayin-an, nagprotesta kontra ha natikagrabeng kagutom. Bitbit an mga kaldero ngan kaserola, nagprotesta an mga membro han Gabriela, Gabriela Women's Party ngan Amihan ha Department of Agriculture hadton Hulyo 7 hiunong ha natikagrabeng kagutom han katawhan. Ginsering nira an diri pala maiha nga sarbey han Social Weather Stations, nga nagse- sering nga usa ha kada lima nga pamilya nga Pilipino, o 27.2% an nahiaagum han "involuntary hunger" o kagutom durot han kakablasan, kama- darahug o pagbabag-o ha kalibungan.

Mga pampubliko nga trabahador para ha dugang nga sweldo ngan kaseguruhan ha trabaho. Nagburunyog an mga empleyado, magtuturo ngan trabahador pankalibugan ha pampubliko nga sektor ha usa nga protesta hadton Hulyo 11 ha Quezon City agud igpanawagan ha rehimen Marcos an dugang nga sweldo ngan kaseguruhan ha trabaho. Iginhimo nira an paggios pira kasemana antes an ika-4 nga *state of the nation address* ni Ferdinand Marcos komo pagduon ha maiha na nira nga demanda. Prinsipal nira nga panawagan an pagbaton han estado ha natikaluros nga kalidad han kinabuhian han mga empleyado atubangan han natikahitaas nga implasyon.

Pagtindog han Ahunan Dam, utro nga gintipahan han mga Lagunense. Masobra usa kayukot nga residente han Pakil, Laguna, kaupod an mga organisasyon han tawo ha singbahan, kabatan-unan, parag-uma, parupangisda, ngan mga tagdepensa han kalibungan, an nagmartsa hadton Hulyo 5 agud igpahayag an ira maku- sog nga pagtipa ha gintitindog nga Ahunan Dam. Tikang ha Saint Peter of Alcantara Parish Church, nagmartsa an mga raliyista tikadto ha upisina han Ahunan Power Inc., diin ginbasa an pahayag han pagkaurusa ngan iginpahayag an kangalas han katawhan.

Bag-o nga CBA, nahidaug ha Fuji Electric Philippines. Ha padayon nga pag-iinsister, nahidaug han Lakas ng Nagkakaisang Manggagawa sa Fuji Electric Philippines Inc. (LNMFEP-OLALIA-KMU) an dugang nga suhol ngan iba pa nga mga benepisyo para ha bag-o nga *collective bargaining agreement*. Tinuig hira nga makakakuha han dugang nga ₱50 ha sakob han tulo katuig, makakakarawat han alawans ha pagkaon, bugas ngan iba pa. An kompaniya pabrika han semikonduktor nga nakabase ha Laguna.

Dorudosena nga "EDCA site" ngan plano nga mga panmilitar nga pabrika

Ginpadagmit nga pangangandam han US ha Pilipinas komo base ha imperyalista nga gerra

Ha nakalabay nga duha ka-tuig, todo-larga an pagpapahiluag han US han panmilitar nga presensya ngan pagtutukod han mga estratehiko nga panmilitar nga imprastuktura hini ha Pilipinas. Hadton 2024, iginpwesto hini an Typhon Missile System ha norte han Luzon. Ginsundan ini yana nga tuig han pagsakob han NMESIS, MADIS ngan iba pa nga mga hinganiban pan-gerra.

Hini gihap nga tuig, gin-amkon han US an nabal nga pasilidad ha Oyster Bay ha Palawan, iginmando an pagtitindog han pabrika han bala ha Subic ngan igin-gawas an pasiuna nga pondo para ha konstruksyon han Subic-Clark-Manila-Batangas Railway. (Kit-an an kasumpay nga artikulo ha AB, Hulyo 7, 2025.) Kaparte ini ngatanan ha pangangandam han US ha nasud komo usa nga dako nga *forward operating base* ha ginsusung-an hini nga imperyalista nga gerra kontra China.

Klaro nga lahos na gud ha siyam nga "ginkaurusahan nga EDCA site" (Enhanced Defense Cooperation Agreement) an gin-amkon ngan gin-gagamit han US nga mga base ha Pilipinas. Ha tahub han waray hunong nga mga *war games*, ginpadagmit han US an konstruksyon han mga baraks, bodega ngan iba pa nga imprastruktura ha sakob han mga kampo han Armed Forces of the Philippines (AFP) agud igbalay an tika-dako nga ihap han mga tropa, higamit ngan sarakyan nga Amerikano nga bug-os nga tuig nga napirme ha sakob ngan palibot han nasud.

Hadton Hunyo, gin-aprubahan han Kongreso han US an \$1-\$5 kabilyon nga pondo para ha "upgrade" han nabal nga duongan han AFP ha Oyster Bay. Gin-gagamit na han US an duongan para ha mga "freedom of navigation operation" ngan "joint patrol" ha South China Sea, kaupod an Australia ngan Japan. Tikang pa 2020 igintransporma han US an murayaw nga komunidad han mga parupangisda didto ngadto ha usa nga yawe nga pasilidad para ha mga barko ngan pandagat nga *drone* nga gin-gagamit hini agud hangriton an mga Chinese nga

barko ngan pahitas-on an tensyon ha South China Sea. Iginpapalusot han AFP ngan US an mga patrulya komo "pagdedepensa ha mga parupangisda nga Pilipino," kundi ha aktwal, an US ngan higgante nga mga barko hini an naghihikaw ha ira pakabuhi ha Oyster Bay ngan kasapit nga kadagatan.

Kadungan hini, nahibali-ta hadin Hulyo an pagtitindog han US han usa pa nga base nabal ha kadagatan han Palawan, ha atubangan han munisipalidad han Quezon. Sigon ha mga report, napili an lokasyon tungod kay hirani ini ha Second Thomas Shoal, usa ha gintikangan han sumpakiay ha dagat giutan han Pilipinas ngan China. Igbabalay dinhi an mga "inflatable boat" nga gin-gagamit ha pag-atake ngan pandugang ha gin-gagamit na han militar han Pilipinas ha pakiggitgitay hini ha mga barko han China. Target han US nga himuon nga aktibo an base ha syahan nga kwarter han 2026.

Hini gihap nga tuig, gintikangan na han US an plano hini nga gamiton an Pilipinas komo dako nga istakan han higamit pan-gerra. Subay ini ha 2025 Joint Vision Statement on Defense Industrial Cooperation nga ginpirmahan han rehimen Marcos ngan gubyerno ni Donald Trump hadton Marso. Pamaagi ini han US agud maseguro an kadagmitan ngan diri mauutod nga suplay han higamit pan-gerra oras nga bumuto an inter-imperyalista nga gerra.

Ha tahub han "kolaborasyon" ngan "pagpapauswag han kapasidad



ha depensa han AFP," titindugon han US ha magkalain-lain nga parte han nasud an mga pabrika hini ha bala, *unmanned systems (drone)*, pasilidad agud magproseso han mga "kritikal nga mineral" nga gin-gagamit ha mga bomba, ngan "additive manufacturing" sugad han *3D printing*.

Hadton Mayo, iginpwesto na han US ha Fort Magsaysay ha Tarlac an usa nga *3D printer* nga mayda kapas nga maghimo han gudti nga drone (gintawag nga *first-person view* o *FPV drone*) nga nakahaum ha tereyn ngan klima han Pilipinas. Gin-gamit ini nga mga *drone* ha iginlansar nga Salaknib Exercises Phase 2 agud "punuan han mga mata" an kagugub-an ngan kabaryuhan ha Northern Luzon. Kabakyang hini nga aktibidad an 7th ID ngan 5th ID han AFP. Antes pa hini, igin-abre na han AFP ngan rehimen Marcos an Aurora para ha pagmamanupaktura han US han mga *drone* hadton 2024.

An mga pabrika, makina ngan higamit pan-gerra nga igpupusisyon ha Pilipinas direkta nga ig-oopereyt han militar ngan mga ahente han mga kapitalista ha militar nga industriya han US.

AB

Pagpapalayas ha mga parag-uma ha Hacienda Chiquita ha Negros Occidental

Naatubang ha hulga han pagpapalayas an mga parag-uma ha 21 kaektarya ngan 79 kaektarya nga tuna nga ira gin huhulad ha Hacienda Chiquita ha E.B. Magalona, Negros Occidental. Igintalaan nga igdidistribwer an tuna ha ilarum han buwa nga Comprehensive Agrarian Reform Program Extension with Reforms (CARPER), kundi yana utro nga gin-aagaw an tuna tikang ha ira.

Naukoy ngan naghuhulad an mga pamilya han mga parag-uma ngan residente ha Hacienda Chiquita nga aada ha lupgop han Barangay Tuburan ngan Barangay Poblacion 1 tikang pa 1952. Maaapektuhan han panlulupot ha tuna an masobra 120 nga trabahador ha uma ngan posible nga magpapalayas ha 300 nga panimalay o 1,500 nga indibidwal.

Hadton 2012, gin-aghat han Department of Agrarian Reform (DAR) an mga parag-uma nga magsumite han aplikasyon agud malupgop han CARPER an 21 kaektarya nga tuna. Iginsubmitter nira an ira mga dokumento ha bulig han National Federation of Sugar Workers (NFSW). Upi-syal nga napatituluhan an tuna hadton 2019.

Nadelatar an pagpwesto ha tuna tungod ha pagtipa han mga agaron maytuna ngan kamahinay han pagproseso han mga dokumento ngan papeles hadton panahon han pandemya ngan Covid-19. Labot pa, gintarget han pagpatay nga pan-gigipit han hadto rehimen Duterte an mga lider-parag-uma ngan grupo

nga nabulig ha mga apektado nga parag-uma.

Imbes nga idayon, ginkansela han DAR an igindistribwer na nga Certificate of Land Ownership Award (CLOA) hadton 2022. Iginpahibaro la ini ha mga parag-uma hadton 2023. Gin-apela han mga parag-uma an pagbawi ha sinunod nga tuig.

Samtang iginpuproseso an apela, nagtikang an konstruksyon han usa nga kalsada hadton Disyembre 2024 diin hagop an upat kaektarya han 21 kaektarya nga tuna.

Nababaraka an mga parag-uma nga kaparte ini han pagdedeklara han kumbersyon han tuna nga kasagaran nga taktika agud pawarayan-pulos an mga CLOA ngan distribusyon. Nahireport gihap nga igin-aandam an tuna para magin sentro han komersyo.

Samtang, an kasapit hini nga 79 kaektarya nga tuna nanenelikado gihap nga agawon. Tungod kay gutiayay na la an pondo para ha CARPER ilarum han rehimen Duterte ngan Marcos, nagin malangan an dalagan han mga kaso ngan petisyon kasumpay dinhi. Ha presente, igintalaan an tuna para ha reklasipikasyon. Plano ini nga ig-alutaga ha usa nga proyekto nga pabalay para ha mga napalayas han mga proyekto ha mga baybayon ha kasapit nga mga barangay.

Hadton Hulyo 9, nagprotesta an mga parag-uma ha merkado han

E.B. Magalona, hirani ha upisina han DAR, agud ig-insister an ira katungod ha tuna.

Buwa nga reporma ha tuna ilarum ni Marcos

Ilarum han rehimen Marcos, waray bag-o nga tuna an ginlupgop han reporma ngan distribusyon. Ha igin-distribwer han DAR nga 195,000 nga CLOA tikang Hulyo 2022 tubtub Enero 2025, 68% o 132,000 hini tikang ha gidaan na nga katin han mga parag-uma nga kolektibo nga CLOA nga ginburublag ilarum han programa nga SPLIT han World Bank. Instrumento an SPLIT agud tilad-tilaron an panag-iya han dagko nga parsela han tuna ngan igpahamtang ini ha *market valuation* (pagtatalaan han balor) para ha pagbubuhis, pagbabaligya ngan ha dayuday ginkukumbert.

Ilarum naman han New Agrarian Emancipation Act (NAEA), ginpapagawas ni Marcos nga "ginpapasaylo" an waray mabaydan nga amortisasyon han mga benepisyaryo han CARP. Kamatuoran, gutiayay nga balor la han daan nga mga utang an ginpasayluan hini ngan diri kalakip an bag-o nga utang han mga benepisyaryo. Aada ha 14% la han target han benepisyaryo ngan 6% han mga parag-uma an nalupgop hini. Sugadman, waray paraon han NAEA an higgante nga kumpensasyon nga iginhahatag han CARP ha mga agaron maytuna, ngan iginpasa la ha katawhan an pagbabayad dinhi. Yana nga tuig, iginmando han Court of Appeals an pagbabayad han estado han ura-ura kadako nga ₱28 kabilyon ha pamilya nga Aquino-Cojuangco para ha Hacienda Luisita.

Ha pinakaesensya, an SPLIT ngan NAEA dugang la ha hilaba na nga listahan han mga pamaagi agud luputon ngan igmonopolyo an tuna han mga agaron maytuna ngan asendero, mga plantasyon ngan dagko nga langyaw nga kompaniya ha agribisnes, *real estate* ngan iba pa.



Pagkaurusa kontra ha makahiribang nga operasyon nga *dredging* ha Ilocos Sur

Nanindugan an mga residente han Ilocos Sur kontra ha makahiribang nga operasyon nga *dredging* han Isla Verde Mining and Development Company (IVMDC) ha gibwangan han Abra River ngan ha parte han West Philippine Sea nga lupgop han prubinsya. Duruyog hira nga nagpalawod ha usa nga *fluvial protest* hadton Hulyo 16 agud ig-insister an pagpapaundang ha operasyon nga sering nira nakakahibang ha kalibungan ngan ira pakabuhi. Nagtitirok gihap hira han pirma para ha usa nga petisyon kontra ha *dredging*.

Gintikangan an *dredging* hadton Mayo 2024 ha tahub han pagpugong ha pagbaha ha Vigan City, Caoayan ngan Santa. Gintugutan an operasyon pinaagi han kasarabutan giutan han IVMDC ngan upisina han Department of Environment and Natural Resources (DENR) ha rehiyon hadton Hunyo 2022. Gintagan han permit an operasyon han Department of Public Works and Highways ngan Mines and Geosciences Bureau.

Tuhtub hadton Disyembre 2024, nakag-ukad na an kompaniya han masobra walo kamilyon nga kubiko metro han materyal tikang ha Banaoang River nga usa nga parte han Abra River. Gindara ini ha Pasay City agud gamiton ha usa nga proyekto nga reklamasyon.

Natutuno nga pakabuhi

Pagtikang pa la han *dredging* o pangukad, iginreklamo na han mga residente ha 12 nga barangay han mga bungto han Santa ngan Caoayan an aringasa, mas grabe nga pagtuno han baras ha baybayon, ngan natikaluros nga dakop han isda. Ha masobra usa katuig, linuros an nadadakop nga isda ha lugar tungod kay natatabrog an mga isda han makusog nga hagu-rong han dagko nga barko.

Kun hadto nakakabaligya hira han ₱1,000 nga balor han isda, yana diri na hira sadang nga nakakadakop han bisan pankonsumo la. Iginreklamo gihap han mga parupangisda nga gasolina na an amyon ngan rasa han mga isda nga

nadadakop hirani ha baybayon.

Naduso an pira nga parupangisda nga pumalawod hin tuhtub 30 kamilya an distansya tikang ha baybayon para la makadakop hin sadang. Tungod dinhi, nadugngan an gastos ha krudo tikang ha hadto ₱500 kada adlaw ngadto ₱1,000 tuhtub ₱3,000 kada adlaw.

Linuros gihap an nakukuha nga ipon (*goby fry*, usa nga klase han isda). Tikang ha hadto 100 kalata (17 kalitro kada usa) nga nadadakop nira, aada nala ha 30 kalata an napupuno nira ha presente. Ha paghimubo han suplay hinitaas gihap an presyo hini ha merkado.

Gin-aapo nga mga komunidad

Imbes nga mabaton an isyu han pagbaha, nababaraka yana an mga residente ha pagbaha tungod ha mas natikadagmit nga pagtuno han baras durot han *dredging*. Ginpagrabe hini an posibilidad han pagbaha labina ha Barangay Dammay, ngan han mga

isla-barangay han Oribi ngan Puro. Doble an kabaraka nira labina nga tikasulod na an nasud ha panahon han mga bagyo.

Iginbuksas ni Dr. Fernando Sirinagan, eksperto ha *marine* ngan *coastal geology*, nga sayop an lugar han operasyon han *dredging*. Sering niya, mayda mga parte han Banaoang River nga kinahanglan ukaron kundi diri an erya diin iginhimo an *dredging*.

Sering niya, magdudurot la an presente nga operasyon han pagbantad ha diri madig-on nga gibwangan han salog ngan mahigop han mga larog tikang ha mga kabaybayunan tikadto ha mga luho nga ginhimo han *dredging* nga magresulta ha pagsulod han dagat ha damo nga barangay. Dugang la hini nga ginpagrabe an problema ha pagbaha imbes nga batunon ini.

Dugang pa han eksperto, sayop gihap an ginhihimo nga pagdara han naukad nga baras ngan graba ha Pasay City. Lugod, kinahanglan la kuno ibalhin an naukad nga mga materyal ha iba nga parte han salog.

Reklamo han mga residente, wayray bisan ano nga pampubliko nga konsultasyon nga iginhimo antes an *dredging*. Nagkamayda la hin porum ha Barangay Rancho ha Santa hadton Nobyembre 2024 han

aada na ha kabutnga an proyekto.

Atubangan hini, panawagan han mga residente ha pangunguna han Defend Ilocos Sur nga ig-undang an *dredging* ha pinakamadagmit nga panahon, baydan hin kumpensasyon an mga nawarayan han pakabuhi, igsapubliko an mga dokumento ngan siyentipiko nga pag-aram hiunong dinhi, ngan pabatonon an kompaniya ha destroso ngan epekto han operasyon ha komunidad.



PAGTALAPAS HA

TAWHANON NGA KATUNGOD

(DISYEMBRE 10, 2024 – HUNYO 30, 2025)

180,074239

IHAP HAN MGA BIKTIMA IHAP HAN MGA KASO

241017

PAGPATAY PANGASTIGO PAGSIKMIT

71923


PAKYAS NGA PAGPATAY PANMIRIT TORTYUR

89173

PANANARHUG, PAN-GIGIPIT NGAN INTIMIDASYON PAG-ARESTO NGAN DETENSYON

2,060

PINIRITAY NGA PAGPAPA-EBAKWET NGAN DISLOKASYON



₱2.4 KABILYON

kaso han korapsyon an iginlalawad kontra kan **Leonor Briones**, hadto anay sekretaryo han DepEd, ngan iba pa nga upisyal han departamento kasumpay han pagpalit hadton 2021 han sobra nga ginpresyuhan nga mga *laptop* para ha mga magtuturdo.

20% TARIPA

an ig-iimponer han US ha mga eksport han Pilipinas (labot ha *semiconductor*, aluminum ngan *wiring*) tikang ha daan nga 17%. Gin-gagamit ni **US President Trump** an mga taripa komo panmugos ha mga nasud agud sumugot ha iya mga dikta.



130 nahireport nga mga trabahador an namatay tikang Enero tubtub Hunyo yana nga tuig tungod ha magkalain-lain nga insidente nga may kalabutan ha katalwasan ha lugar han trabaho.

Ginkuhaan: Institute for Occupational Health and Safety Development



₱100/kilo ↓

iginluros nga pamaligya han **tawilis** tikang ha daan nga ₱250/ kilo tungod ha kahadlok han mga mamaralit ha ginsesering nga pagkakadiskubre han mga patay nga lawas han mga "nawawara nga paragbulang" ha Taal Lake.

₱154.51 KABILYON

an kita han estado tikang ha *online* nga paghuygo hadton 2024, tulo kapilo nga mas dako tanding ha nakalabay nga tuig. Dinako hin 465% an kabug-usan nga kita hini ha ikatulo nga kwarto han 2024 tanding ha 2023.

39%

han mga Pilipino an naghuhuygo *online*, kaupod an pinakakablas ngan mga menor-de-edad. **Naadik ha sugal an damo ha ira.**



112.73 KAMILYON

populasyon han Pilipinas nga nahilista hadton Hulyo 1, 2024; 3.69 kamilyon nga mas damo tanding ha 2020. An 5-katuig nga tantos han pagdako nga 0.8% mas mahinay tanding ha 1.63% nga pagdako ha panahon han 2015-2020 2015-2020.

Ginkuhaan: Philippine Statistics Authority

Mga proyekto nga *renewable energy*, ganansya han mga negosyante, destroso ha katawhan

Ha iya syahan nga State of the Nation Address, iginpahayag ni Marcos nga an *renewable energy* (RE) iginkukunsidera han iya gubyerno nga yawe nga sektor para kuno ha pagpapauswag han ekonomiya han nasud. Tikang hadto, nagin agresibo ngan butaray an panlulupot han tuna ngan paghibang ha kalibungan agud tagan-dalan an mga mamuruhunan ha RE ha nasud. Maabot ha 68% han langyaw nga pamumuhunan hadton 2024 ha mga proyekto nga RE.

Ilarum han National Renewable Energy Program (NREP), target nga 50% han enerhiya han Pilipinas pag-abot han 2040 tikang ha RE. Binugos ini ha katuyuanan kuno nga magkamayda hin "sustainable nga maku-kuhaan" han enerhiya. An RE diin man ha enerhiya nga *biomass* (pagdunot han organiko nga materyal), *solar* (adlaw), *wind* (hangin), *geothermal* (mapaso nga alisngaw tikang ha tuna) ngan *hydropower* (tubig).

Dugang nga ginpasayon ngan ginpadagmit ni Marcos an paghahatag han permit ngan lisensya ha mga langyaw nga kapitalista nga mamuruhunan ha RE. Hadton Abril, naghatag an Department of Energy han permit para ha 1,319 nga proyekto nga RE, 39% o 517 dinhi proyekto nga *solar*. An Ilocos an ika-upat ha mayda pinakadamo nga proyekto nga *solar*, nga mayda 53 nga proyekto. Target gihap han estado nga magkamayda hin 46,000 kaektarya nga *solar farms* pag-abot 2040.

Madagmit naman nga ginsingabot han mga lokal nga dagko nga burgesya kumprador an mga proyekto nga RE ha nasud agud mapulsan ini. Kalakip dinhi an Solar Philippines New Energy Corp. (SPNEC) ni Manny Pangilinan, AC Energy Corp. (ACEN) han mga Ayala, APC Group Inc./Philippine Geothermal Production Co. han pamilya Sy, Astra Solar Energy Corp. han kompaniya nga Aboitiz, San Miguel Global Power Holdings ni Ramon Ang ngan Energy Development Corporation (EDC) han Lopez Group.

Usa ha pinakamakahiribang nga RE nga proyekto an 3,500 kaek-

tarya nga *solar farm* (mas dako pa ha bug-os nga tuna han Makati City ngan Mandaluyong) nga pananag-iya han Meralco Terra Solar ha parte han Bulacan ngan Nueva Ecija. Nakatalaan ini magin pinakadako nga *solar* ngan *battery facility* ha bug-os nga kalibutan. Pananag-iya ini han SPNEC ngan Actis, kompaniya nga nakabase ha United Kingdom.

Lulupgupon naman han Laguna Lake Floating Solar Project an 2,000 kaektarya han danaw ha parte han Calamba, Santa Rosa, Cabuyao, Bay ngan Victoria. Pananag-iya an proyekto han ACEN ngan mga kompaniya tikang Singapore ngan UK.

Kalakip ha pinakadagko nga *offshore* ngan *onshore windfarm* igitindog ha San Miguel Bay, Camarines Sur, nga malupgop ha 23,307 kaektarya nga *municipal waters* han San Miguel. May kapasidad ini nga 1,000 *megawatts* (MW) ngan pananag-iya ini han Copenhagen Infrastructure New Market Fund Corp., kompaniya tikang Denmark


ngan ACEN nga mayda 25% nga sosyo. Igitindog gihap an 1,200 MW Guimaras Strait OSWF nga igitindog ha butnga han Panay ngan Negros nga pananag-iya han mga kompaniya tikang Switzerland ngan Liechtenstein. Igitindog gihap han ACEN an 2,510 MW Quezon North Wind Farm ha Real, Quezon ngan an 625 kaektarya nga North Luzon Renewable Wind Farm ha Pagupud, Ilocos Norte.

Aada ha 99 nga proyekto nga *hydropower*, nga mayda kabug-usan nga 4,000 MW, an gin-aprubahan han gubyerno ha Cordillera. Upat hini nga mga proyekto pananag-iya han kompaniya tikang Australia. Nakatalaan gihap magtindog han tulo nga *geothermal power plant* (GPP) ha rehiyon nga maghihimo han kabug-usan nga 300 MW nga kuryente. Ini an Buguias-Tinoc GPP nga pananag-iya han EDC, ngan Kalinga GPP ngan an Mainit-Sadanga GPP nga pareho nga pananag-iya han APC.

Iginrarason han reaksyunaryo nga estado an "pag-atubang ha krisis ha klima" agud igpalusot an bilyun-bilyon nga balor nga proyekto nga RE. Kundi an tinuod, ginpapaluya an kapas han nasud nga atubangon an mga bagyo han pagbabag-o han klima ha waray-hunong nga paghibang ha kalibungan agud tagan-dalan ini nga mga pasilidad.

Mas grabe pa, pira kanapulo ka-yukot nga parag-uma, parupangisda ngan nasyunal nga minoriya an mawawarayan han pakabuhi

ngan puruy-anan ngan yukut-yukot kaektarya nga agrikultural nga tuna, kadagatan ngan kagugub-an an hihibangon ha ngaran han malimpyo nga enerhiya nga monopolisado han langyaw ngan lokal nga burgesya kumprador.



Kangalas ngan pag-ato han katawhan ha pakuri ngan niyutiyo nga estado ha Kenya

Utro nga bumuto ha Kenya hadton Hunyo an kangalas ngan protesta kontra ha kontra-katawhan nga proposisyon han pagbubuhis ngan pag-papakaniyutiyo han gubyrno dinhi. Hadton Hunyo 25, yuket-yukot nga Kenyan an rumabunos ha mga kalsada han Nairobi, Mombasa, Kisii ngan iba nga syudad agud igsalin-urog an mga protesta hadton nakalabay nga tuig. Diri mamenos ha 16 an napatay ngan masobra 400 an nasamaran han madarahug nga bungkagon ini han mga pulis.

Hadton Hulyo 7, 38 nga raliyista an napatay, samtang 107 an nasamaran ngan masobra 500 an gin-aresto han bungkagon han mga pulis an mga demonstrasyon nga nagsalin-urog ha ika-35 nga anibersaryo han "Saba Saba" o "pito pito" ha yinaknan nga Kishwahili. Hini nga adlaw hadton 1990 iginlansar an higante nga rali nga nagduso ha hadto anay presidente han Kenya nga bag-uhon an sistema han pan-gugubyrno. Gin-gamit han katawhan an okasyon agud iduso an pagpapatalsik ha presente nga presidente han nasud nga hi William Ruto.

Bumuylo an mga protesta hadton 2024 kontra ha Finance Bill, usa nga proposisyon nga mag-iimponer han higtaas nga buhis ha batakan nga papliton ngan serbisyo, magtatanggal ha mga subsidyo, ngan mag-iiban ha badyet para ha mga pankatilingban nga serbisyo. Dikta han International Monetary Fund an proposisyon komo kundi-son ha pagpapa-pautang. Katu-yuanan hini nga pa-dakuon an kita han estado agud seguruhon nga makakagbayad ini han utang, nga aada ha \$76.6 kabilyon hadton Abril, katugbang han 75% han *gross domestic product* (GDP) han Kenya. Napaatras an proposisyon hadton nakalabay nga tuig kundi diri hul-os nga iginpabasura. Lugod, gintiros ngan tuso nga iginpapalusot ni Ruto ha parlamento an paru-parte hini.

Para ha damo nga Kenyan, ginta-taglawas han Finance Bill an neokolonyal ngan neoliberal nga direksyon han rehimen Ruto. Segurado hira nga susugbungon han mga trabahador

ngan kabras nga sektor han katilingban Kenyan an magbug-at nga buhis. Maaram hira nga diri ini maaakos han ordinaryo nga katawhan nga ludlod ha kakurian, waray pormal nga trabaho ngan naatubang ha gidaan na nga higtaas nga presyo han mga papliton ngan serbisyo. Iginkangalas nira an pagin niyutiyo ni Ruto ha mga dikta han imperyalista nga institusyon.

Hinaluag an mga protesta ngadto ha kagiusan nga pagpapatalsik kan Ruto kahuman han serye han magdarahug nga pambubungkag, tinagdamo nga pangaresto, natikadamo nga kaso han pagsikmit ngan pirit nga pagpawara han mga lider-protesta, ngan mga panmatay.

Kadungan han grabe nga krisis ha ekonomiya an krisis ha pulitika han naghahadi nga klase. Aktibo nga gin-aayat an poder ni Ruto han hadto anay *deputy president* han nasud nga hi Rigathi Gachagua. Na-*impeach* hi Gachagua hadton 2024 ha mga kaso nga pagtalapas ha konstitusyon, pambuhag basar ha etnisidad, ngan pag-

papaluya ha otoridad han gubyrno.

Kamutangan han katilingban ngan katawhan Kenyan


Atrasado ngan agraryo an katilingban Kenyan. Nakasarig an agrikultura hini ha gudti ngan burublag nga produk-syon. Ginkokomponer hini an tubtub 37% han GDP ngan 40% han kabug-usan nga empleyo. Limitado an industriya, ngan guti an parte han pagmamanupaktura ha GDP (8%).

Ha nakalabay nga mga tuig, nahagum an nasud han grabe nga krisis ha empleyo. Hadton 2022, inabot ha 13.9% an tantos han disempleyo, pinakagrabe ha ranggo han kabatan-unan. Gintatantiya nga 67% han kabatan-unan nga Kenyan, edad 15 tubtub 34, an waray trabaho.

Samtang, aada ha impormal nga sektor an 80% han mga trabaho o sobra 17 kamilyon ha kabug-usan nga 20 kamilyon. Hadton 2024, 90% han bag-o nga nahimo nga trabaho impormal, kadam-an ha pinatipat nga pamaligya ngan tinaggudti nga pagmamanupaktura.

Nakaraysang an suhol han trabahador nga Kenyan ha \$177/bulan (P6,680) samtang ginsesering nga aada ha \$138 (P7,880) ha kabaryuhan ngan \$299 (P17,000) ha kasyudaran an makaburuhi nga suhol para ha 5-katawo nga pamilya.

Gawas ha mga syudad, naatubang an parag-uma nga Kenyan ha kawaray-tuna, gudti nga umhanan, atrasado nga produk-syon, diri pagkakapapreho nga pananag-iya han tuna giutan han kababayin-an ngan kalalakin-an, ngan pankabug-usan nga kakablasan. Aada ha 50% han tuna han nasud an iginkukunsidera nga agrikultural kundi 20% la dinhi an haum ha pag-uma. An 20-30% pa hini gintatanuman han pan-eksport nga mga panin anum sugad han tsaa, kape ngan bukad.



**Pagbista ha kaso ha ICC,
igindedelatar han kampo
nga Duterte**

Susrunod nga petisyon an iginsubmitter han kampo ni hadto anay presidente Rodrigo Duterte agud igdelatar an pagbista ha iya kaso nga krimen kontra ha bug-os nga katawhan ha Pre-Trial Chamber 1 han International Criminal Court (ICC). Pinakaurhi dinhi an petisyon para ha "kadagmitan nga status conference" nga iginsalawad hadton Hunyo 17 agud kwestyunon an iskedyul han pag-atubang ni Duterte ha korte ha Septyembre 23. Gin-gamit pa hini nga rason an kunuhay mga "delay" o kadelatar han mga pangangandam han prosekusyon.

Antes hini, iginpabasura na han korte an iba pa nga mga "delaying tactic" han mga abugado ni Duterte. Usa dinhi an petisyon agud igdiskwalipika an duha nga huwes nga nakatin han iya kaso. Hadton Hulyo 3, diniri an plenaryo han ICC ha ira demanda nga tanggalon hira Judge María del Socorro Flores Liera ngan Judge Reine Adélaïde Sophie Alapini-Gansou tikang ha Pre-Trial Chamber I.

Sigon ha ICC, waray basaranan an alegasyon han kampo ni Duterte nga mayda ginpaburan an mga huwes tungod ha nahiuna nira nga pagkakadabi ha desisyon kasumpay ha karukayaknon han hurisdiksyon han korte ha kaso. Ginklaro han ICC nga kaparte han trabaho han mga huwes an utro nga paghisgot ha mga ligal nga karukayaknon samtang naabante an kaso, ngan diri ini nangangahulugan han pagpabor o bias.

Duha pa nga petisyon nga pampadelatar ha proseso an iginsalawad han mga abugado ni Duterte. An syahan an hurisdiksyon han korte kan Duterte tungod kay diri na membro han ICC an Pilipinas ngan an ikaduha an paghangyo han iya *interim release* o temporaryo nga paggawas. Waray pa desisyon an korte ha pareho nga petisyon. Ha kaso han *interim release*, mahugot ini nga gintipahan han mga biktima, ngan ira mga abugado, ngan bisan han prosekusyon han ICC.

Samtang, padayon an pag-abante han kaso ha korte. Hadton Hulyo 1, nagsubmitter an prosekusyon han ika-11 nga katirig-uban han ebisdensya kontra ha hadto anay nga presidente, kalakip an masobra 1,000 nga dokumento nga naglulupgop ha mga pagpatay tikang ha panahon niya komo meyor han Davao City tubtub ha iya termino komo presidente.

AB

**₱20 nga pamalit han presko nga humay,
gin-insister han mga parag-uma ha Nueva Ecija**

NAGSALAWAD HAN PETISYON an mga parag-uma ha Barangay Bantud, San Roque ngan iba pa nga barangay ha Guimba, Nueva Ecija agud himuon nga ₱20 kada kilo an minimum nga pamalit han presko nga humay yana nga bulan han Hulyo. Sering nira, naabot ha ₱14 kada kilo an puhunan ha humay kundi ginpapalit la ini ha presyo nga ₱10-12. Ha butnga han kat-ani, mayda mga komersyante nga iginbagsak pa an pamalit ngadto ha ₱5/kilo.

Waray bublaran ngan waray gihap mga trak agud madara han mga parag-uma ha National Food Authority an ira ani. Kulang ha pondo an ahensya agud magin mapulsanon ha ira. Tungod dinhi, napipiritan hira nga karawton an pambabarat han mga komersyante.

Usa ha pinakadako nga prodyuser han bugas an Nueva Ecija, ngan an Guimba ha partikular. Ha datos para ha syahan nga kwarter han 2023, nakag-ani dinhi han 345,547 kametrikong tonelada (MT) han humay. Ini an 39.8% han kabug-usan nga produksyon han humay ha Central Luzon. Ginkokomponer han Central Luzon an 18.1% han nasyunal nga output han humay.

Hadton Hunyo, nagtindog an NFA han ₱63.9 kamilyon nga Rice Processing System (RPS) II Facility ha Muñoz City. Masobra 19 kakilometro an kahirayuan hini ha San Roque, ngan akos magserbisyo ha tubtub 6,000 nga parag-uma. Ha Guimba pala, mayda gintatantiya nga 7,500 - 15,000 nga parag-uma.

Labot ha ₱20 nga pamalit, gindemanda gihap han mga parag-uma nga igpabasura an Rice Liberalization Law (RLL) o RA 11203 tungod kay sering nira iginduduso la hini an guberno nga sumarig ha agrikultura han iba nga nasud para ha panginahanglan han mga Pilipino.

Mahugot nga ginsuportahan han Kilusang Magbubukid ng Pilipinas (KMP) an panawagan han mga parag-uma ha Guimba.

Sering hini, gin-gagamit han mga komersyante an pagbaha ha merkado han imported nga bugas agud dugang pa nga palurason an pamalit han lokal nga humay. Hini nga kamutangan, napeperdi ngan dugang nga nalulubong ha utang an mga parag-uma han humay. An mga trader ngan importer gud la an nagpupulos.

Semana han paghandum ha mga martir han India

NAGPAHAYAG HAN PAKIKIG-USA an Partido Komunista ng Pilipinas (PKP) ha nakatalaan nga Semana han Paghandum ha mga Martir nga ighihimo han Communist Party of India (Maoist) ha Hulyo 28 tubtub Agosto 3. Kaupod ha papasidunggan hiton nga semana an namartir nga sekretaryo han CPI (Maoist) nga hi Kasamang Basavaraju (Nambala Keshava Rao).

Sigon ha PKP, an mga bayani han katawhan Indian maikukonsidera nga bayani gihap han katawhan Pilipino tungod kay naghalad hira han kinabuhi ha pakigbisog para ha nasyunal ngan pankatilingban nga katalwasan. Ngaduha ha India ngan Pilipinas, natuod an PKP nga tikadamo nga ihap han mga trabahador, parag-uma ngan gintatalumpigos nga klase an mahasog ha rebolusyunaryo nga dalan komo pagpapadayon ha kawsa han ira mga martir.

Gin-aaghat han PKP an ngatanan nga rebolusyunaryo nga pwersa ha Pilipinas nga makig-usa ha Semana han Paghandum.